



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 484/6 prot.

Tiranë, më 29.07.2024

VENDIM

Nr. 1098, Datë 29 . 07. 2024

“MBI AUTORIZIMIN E PËRQENDRIMIT TË PROPOZUAR NËPËRMJET PËRFTIMIT
TË KONTROLLIT TË PËRBASHKËT TË SHOQËRISË TERMINALE GNL
ADRIATICO S.R.L. NGA SHOQËRITË VIKKA VTTI S.P.A. DHE SNAM S.P.A.”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Rezana KONOMI	Anëtar
Z.	Durim KRAJA	Anëtar
Znj.	Fatjola DELIJA	Anëtar

Në mbledhjen e tij të datës 29. 07. 2024, shqyrtoi çështjen me:

Objekti: Autorizimi i përqendrimit të realizuar nëpërmjet përfimit të kontrollit të përbashkët të shoqërisë TERMINALE GNL ADRIATICO S.R.L. nga shoqëritë VIKKA VTTI S.p.A. dhe SNAM S.P.A.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm, si dhe raportit të Drejtorisë së Analizës dhe Metodologjisë së Tregjeve mbi njoftimin e përqendrimit të realizuar nëpërmjet përfimit të kontrollit të përbashkët të shoqërisë TERMINALE GNL ADRIATICO S.R.L. nga shoqëritë VIKKA VTTI S.p.A. dhe SNAM S.P.A.

VËREN SE :

I. Palët në transaksion dhe procedura

Pranë Autoritetit të Konkurrencës është njoftuar transaksioni i përfundimit të kontrollit të përbashkët të shoqërisë TERMINALE GNL ADRIATICO S.R.L. nga shoqëritë VIKKA VTTI S.p.A. dhe SNAM S.P.A.

Referuar dokumenteve të depozituara nga pala njoftuese, palët në transaksion janë:

Blerësit:

VIKA VTTI S.p.A (në proces të ndryshimit të emrit në VTTI LNG Italy S.p.A.) është një shoqëri aksionare, e themeluar sipas legjislacionit italian, e kontrolluar në mënyrë indirekte nga VTTI B.V.

VTTI B.V. është një shoqëri me përgjegjësi të kufizuar private, e themeluar sipas legjislacionit të Hollandës, e cila zotëron, administron, operon dhe zhvillon asete të infrastrukturës energjetike në nivel kombëtar, me fokus në sigurinë dhe qëndrueshmërinë. VTTI zotërohet në mënyrë indirekte nga Vitol Holding II S.A. dhe IFM Investors Pty Ltd, në cilësinë e saj si këshilltare e Fondit Global të Infrastrukturës IFM.

SNAM S.P.A. është një shoqëri aksionare, e themeluar sipas legjislacionit të Italisë, i cili zotëron operatorin kryesor të sistemit të transmetimit të gazit në Itali dhe ka interesa në shoqëri aktive në tregjet e transmetimit, rigazifikimit dhe ruajtjes së gazit edhe në vende të tjera të BE-së. SNAM S.P.A. është e listuar në bursën italiane dhe kontrollohet në mënyrë të tërthortë nga CDP.

SNAM S.P.A. është prezente në Shqipëri, indirekt, nëpërmjet shoqërisë Albanian Gas Service Company SHA, shoqëri aksionare, e themeluar sipas legjislacionit shqiptar, e krijuar si një shoqëri plotësisht operative, e cila është përgjegjëse për kryerjen e veprimtarisë, mirëmbajtjes dhe shërbimeve teknike për Trans Adriatic Pipeline AG sipas Marrëveshjes për Mirëmbajtjen, që do të lidhet ndërmjet kësaj shoqërie dhe Trans Adriatic Pipeline AG, si edhe çdo veprimtari ndihmëse që mund të jetë e nevojshme ose e dobishme për arritjen dhe ushtrimin e këtij qëllimi.

SNAM S.P.A. zotëron 25% të Albanian Gas Service Company SHA.

VTTI B.V. dhe SNAM S.P.A. nuk janë aktive në tregun e infrastrukturës së importit të gazit, por kanë realizuar të ardhura indirekt për vitin 2023.

Shoqëria Target: TERMINALI GNL ADRIATICO S.R.L. është një shoqëri me përgjegjësi të kufizuar, e themeluar sipas legjislacionit të Italisë, me objekt aktiviteti zotërimi dhe operimi i një terminali rigazifikimi të GNL në detin Adriatik në provincën e Rovigos, Itali. TERMINALE GNL ADRIATICO S.R.L. ofron shërbime të rigazifikimit të GNL-së (përfshirë ngarkimin, depozitimin, fleksibilitetin, matjen dhe shërbimet detare).

TERMINALE GNL ADRIATICO S.R.L. aktualisht kontrollohet nga ExxonMobil Italiana Gas SRL (rreth 70.7%), Qatar Terminal Limited (rreth 22%) dhe SNAM S.p.A. rreth 7.3%.

TERMINALE GNL ADRIATICO S.R.L. është aktive vetëm në Itali.

II. Transaksioni

Më datë 27 mars 2024, dega e VTTI B.V., VIKKA VTTI S.p.A., ExxonMobil Italiana Gas SRL dhe Qatar Terminal Limited përfunduan “Marrëveshje e shitblerjes së kuotave”, për të blerë pjesëmarrjet përkatëse të ExxonMobil Italiana Gas SRL dhe Qatar Terminal Limited, në shoqërinë target TERMINALE GNL ADRIATICO S.R.L.

Referuar deklarimeve të palës njoftuese në Formularin e thjeshtuar të njoftimit të përqendrimit, marrëveshja e mësipërme shkaktoi aktivizimin e së drejtës së parablerjes së SNAM S.P.A., për të rritur pjesëmarrjen e saj në shoqërinë target në 30%, duke dërguar një njoftim blerjeje tek ExxonMobil Italiana Gas SRL dhe Qatar Terminal Limited, me anë të të cilit pranoi termat dhe kushtet e VTTI S.P.A.

Më datë 03 prill 2024, SNAM S.P.A., ExxonMobil Italiana Gas SRL dhe Qatar Terminal Limited, përfunduan “Marrëveshje e shitblerjes së kuotave”, një marrëveshje e veçantë, duke pasqyruar termat dhe kushtet e Marrëveshjes së shitblerjes së kuotave, datë 27.03.2024.

Pas realizimit të transaksionit, VIKKA VTTI S.p.A. dhe SNAM S.P.A. do të përfundojnë “Marrëveshjen e Aksionarëve”, ku përcaktohet që Këshilli Drejtues do të përbëhet nga 5 (pesë) anëtarë nga VIKKA VTTI S.p.A. dhe 2 (dy) anëtarë nga SNAM S.P.A. VIKKA VTTI S.p.A. dhe SNAM S.P.A. do të kenë të drejtën e vetos për Çështjet e Rezervuara B., të cilat përfshijnë, *inter alia*: 1. Miratimin ose ndryshimin e planeve të punës dhe buxhetit, duke përfshirë buxhetin vjetor dhe Planin Financiar dhe miratimin e çdo çështjeje që do të përfshihej në Planin Financiar; 2. Emërimi i Drejtorit Ekzekutiv dhe Komitetit Ekzekutiv të Administrimit dhe delegimi i çdo autoriteti te CEO, te çdo komitet (përfshirë Komitetin Ekzekutiv Administrativ) të Këshillit Drejtues dhe te çdo zyrtar apo punonjës i TERMINALE GNL ADRIATICO S.R.L.

Pas përfundimit të transaksionit, VIKKA VTTI S.p.A. do të mbajë një kuotë që përfaqëson 70% të kapitalit të shoqërisë target TERMINALE GNL ADRIATICO S.R.L., ndërsa SNAM S.p.A. do të mbajë një kuotë që përfaqëson 30%-in e mbetur.

Referuar dokumentacionit të depozituar, transaksioni i propozuar përbën një përqendrim, nëpërmjet përfutimit të kontrollit të përbashkët të shoqërisë target, i cili është në përputhje me nenin 10 dhe 12 të ligjit nr. 9121 datë 28.07.2003 “Për mbrojtjen e konkurrencës” dhe si i tillë, është objekt autorizimi nga Komisioni i Konkurrencës.

III. Analiza e konkurrencës

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit Nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu i infrastrukturës së importit të gazit, por duke qenë se transaksioni nuk do të ketë ndikim në tregun shqiptar, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Transaksioni i propozuar konsiston në përfutimin e kontrollit të përbashkët të shoqërisë TERMINALE GNL ADRIATICO S.R.L. nga shoqëritë VIKKA VTTI S.p.A. dhe SNAM S.P.A.

VIKA VTTI S.p.A kontrollohet indirekt nga VTTI B.V.

VTTI B.V. nuk është aktive në Shqipëri. Shoqëria mëmë e saj, Vitol Holding II S.A., është aktive në furnizimin me shumicë të gazit natyror, por në vitin 2023 nuk ka realizuar shitje në Shqipëri. Për vitin 2023, shitjet janë realizuar nga ndërmarrjet e kontrolluara prej saj.

SNAM nuk është aktiv në tregun përkatës në Shqipëri. SNAM kontrollon infrastruktura të ndryshme, duke përfshirë tubacionet dhe терминаlet e importit të GNL-së, të përdorura për importimin e gazit natyror në Itali. Ajo është gjithashtu aktive në transmetimin dhe ruajtjen e gazit natyror.

TERMINALE GNL ADRIATICO S.R.L. është aktive në tregun e infrastrukturës për importin e gazit në Itali, por jo në Shqipëri. Aktualisht, nuk ka terminale GNL funksionale në Shqipëri.

Asnjë nga Palët nuk angazhohet në territorin shqiptar, në asnjë nga aktivitetet e gazit natyror si: prodhim dhe kërkim i gazit natyror; furnizimi me gaz me shumicë; infrastruktura e importit të gazit; magazinimi i tij; tregtimi i gazit në qendrën e gazit etj.

Nga sa më sipër, Transaksioni i propozuar nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë ndryshim dhe nuk do të ketë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,


VENDOSI:

1. Të autorizojë përqendrimin e propozuar nëpërmjet përfutimit të kontrollit të përbashkët të shoqërisë TERMINALE GNL ADRIATICO S.R.L., nga shoqëritë VIKKA VTTI S.p.A. dhe SNAM S.P.A.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS

Leida MATJA

(
Zv/Kryetar

Rezana KONOMI

(
Anëtar

Durim KRAJA

(
Anëtar

Fatjola DELIJA

(
Anëtar

Denar BIBA

(
Kryetar

